

quentissime vox ista, *Mundus*, significat gratia Dei vacuos. Unde Dominus de discipulis ait: *Mundus odio eos habuit, quia non sunt de mundo, sicut & ego non sum de mundo.* Quod ergo dedit discipulis Dominus ex tempore, ut eos de mundo subduceret, cur hoc non dederit dilectissima Matri suae, ac sponsae, ut nunquam cum iis ab initio creationis illius, qui essent de mundo, computaretur? Nec illud obstat, quod addunt: peccatum, & mors pari passu incedunt. Nam non est huiusmodi ordo in Apostolo, in quem mors intravit, in eum quoque intravisse peccatum; sed e converso: In quem peccatum in eum & mors. Alioquin & Christus mortuus est; & tamen non intravit in eum peccatum.

VIII. Probatur confessione nostrae Religionis, & nostrae catholicae Ecclesiae hostium. Mahometus Azoara 5. „ Diva Maria omnibus viris, & mulieribus splendidior, & mundior, atque lotior, soli Deo perseveranter studens „ : Azoara 75. „ Nullus nascitur de filiis Adam, quem non tangat Sathan, praeter Mariam, & eius Filium. Multi perfecti fuerunt: nulla unquam perfecta ex mulieribus, nisi Maria mater Iſae „. Martinus Lutherus in Evangelium de Conceptione Mariae: „ Virgo Maria quodammodo inter Christum, & alios homines medium tenet. Si quidem Christus cum conciperetur, & viveret, eo ipso articulo temporis plenus gratia fuit. Caeteri homines sine gratia sunt, tam in priori, quam in posteriori Conceptione. Atqui Virgo Maria, „ quamvis juxta priorem conceptionem non plena erat gratia; tamen juxta alteram conceptionem plena erat gratia; atque hoc non immerito. Nam medium fuit inter omnes natiuitates: & patre enim, & matre nata est, ipsa vero sine patre peperit, & mater facta est, partum carnalis, partim vero spiritualis Filii. Jam vero sicut Virgo Maria rite inter carnalem, & spiritualem natiuitatem medium est, finis carnalis initium autem spiritualis: ita etiam iuste medium tenet inter conceptionem &c. Dignum, & iustum erat Mariae personam ab originali peccato praeservari, da qua Christus sumpturus erat carnem, quae omnia peccata superaret &c. Nulla mulier tam sancta est, nec fuit, nec erit in posterum, quae, praeter Mariam, „ fructum ventris sui benedictum pariat, „ quando nulla citra voluptatem, & peccatum concepit; propterea & Angelus Gabriel ad Mariam dicebat: *Benedicta tu inter mulieres &c.* Christus sine peccato tam corpore, quam anima: ita Maria,

„ Virgo, juxta corpus quidem sine gratia, „ juxta animam autem plena gratia concepta est &c. In Virginis Mariae Conceptione, cujus corpus progressu temporis, juxta aliorum infantulorum ritum factum est, usque ad animi infusionem, non opus fuit tali conceptione, quemadmodum Christi, videlicet, quem solum Deum, & hominem citra viri operam omnibus membris absolutum concipi, oportebat. Potuit enim Maria ab omni originali peccato praeservari, donec anima infundenda esset &c. Mariae Conceptio, pie creditur, sine originali peccato facta esse, ut scilicet in ipsa animae infusione, una etiam ab originali peccato purificata fuerit, divinis dotibus redimita, ad accipiendam sanctam animam, a Deo ipso infusam. Atque ita in primo momento, cum vivere inciperet, omnis peccati experta erat „. In Evangelium de Annuntiatione Mariae: „ Siquidem gratia Dei, ipsam omnino boni abundantem facit, & ab omni male liberat. Secundo Deus cum ea est, hoc est, omne, quod facit, aut omittit, divinum est, & in eo a Deo perficitur: ad haec tatur eam, & defendit ab omni, quod obnoxium, & incommodum esse potest „.

IX. Probatur rationibus I. B. Virgo fuit idonea mater Dei; sed si peccatum originale contraxisset, non fuisset idonea mater Dei: ergo peccatum originale non contraxit. Probatur minor. Non fuisset idonea Mater Dei, si commisisset peccatum veniale: ergo non fuisset idonea mater Dei, si contraxisset peccatum originale. Antecedens est S. Thomae 3. par. qu. 27. art. 4. docentis, B. Virginem nunquam peccasse venialiter, quia non fuisset idonea mater Dei, si peccasset aliquando. Consequentia probatur. Ideo non fuisset idonea mater Dei, si peccasset venialiter, quia in aliquo aliquando Deo displicisset, ejusque imperfectam inimicitiam subiret, atque aliqualem peccati servitutem; sed hoc idem fuisset, si peccatum originale contraxisset: ergo &c. II. Potuit Deus praeservare Mariam Virginem a peccato originali, & decuit etiam, ut eam praeservaret: ergo de facto praeservavit. Antecedens pro prima parte a nemine negatur; & pro secunda, est doctrina S. Anselmi lib. de Conceptu Virginis: *Decens erat, ut ea puritate, qua major sub Deo nequit intelligi, Virgo illa niteret*, Consequentia optime inferitur; Deum enim, asserendum est, fecisse quod potuisse, ac decuisse, ut faceret, judicamus. III. Omnis